



Oma de bunté y de misericordia, i vegni plen de confidanza da te.  
 I conscidreii l'ejempl de töa vita y i te preii, deidemo ince me da vire mia vita tal Spirit de Gejú, to Fi.  
 Dámo töa umilté da laldé y rengrazié l'Onipotent por söes opres de salveza.  
 Dámo töa devoziun co chir söa vijinanza y töa atenziun daverta a söa parora.  
 Dámo töa desponibilité da fá söa orenté y töa generosité da se meter a sorvisc.  
 Dámo töa pureza co scombat le picé y le mal.  
 Dámo töa forza y pazionza co la ten fora ince sot la crusc.  
 Oh bona uma, dámo dantadöt to cör credont, to cör plen d'amur y de dediziun.  
 Santa Maria, tö compagna de mia vita, condüjemo söle tru da Chelbeldio.  
 Amen.

(da Gotteslob)



De dla oma – oraziun de iolan

Bel Dio, i te diji iolan de mia oma tan demorveia. Ara m'á motü al monn, a d'era y a mio pere ti sunse de debit la vita. Con fineza m'ára tut te sü brac. Ara capía ci co me fajea bun y â ienn. Ara mo cuntâ dant y m'â motü a rí. Mo tigninn pa söa man âi emparé da jí. Ara se ralegrá por vigne vare ch'i jea ennant. Degügn ne m'á consolé deplü co era, sc'al ea val' co mo drucâ. Benedescela y fá so cör encontont, dáí forza y ejaudesc i dejiers de so cör – encô y por dagnora. Amen

1 Enformaziuns y termins

**Comun de Mareo:** aladô dla lege 11.12.2016 n. 232, pó les speises co é gnüdes paiades tal ann 2019 por le sorvisc de refeziun y scolina gní trates jö dala cuta tla mosüra max. de 800,00 € al'ann por möt/a. Les atestaziuns pó gni damanades o prenotades por telefon, ☎ 0474 503760 (danmisdé) o por e-mail a margareth.rubatscher@comun.mareo.bz.it

“**Iu deidi**” - **8promile / 5promile:** la diozeja preia do nosta firma sön la detlaraziun dla culta por le 8promile ala Dlijia y ince por le 5promile a ben de istituziuns co sosten le voluntariat. → Enformaziuns plü avisa sön flyers motüs fora te dljia.

<b>Döt le bun a:</b>	Irma Daporta Barth, Graz	* 13.05.1923
	Giovanni Nepomuk Agostini, Valsperch	* 15.05.1932
	Emma Obermair, Feldthurns	* 15.06.1945
	y a düc chi co á santennom y complesc i agn cöst'edema	

**Impressum:** Ploania d'La Pli; redaziun Franz Rigo y Edith Willeit  
**Comunicaziuns** cina le dedemesaledema sera a Franz Rigo: ☎ 0474 500978 o ✉ ploania@gmx.net  
**Download plata:** www.unitepastorala.org



Gejú Crist nosta strada

St.Ap 6, 1-7 | 1 Pire 2, 4-9 | Jan 14, 1-12

Dal Vangelo do San Jan:

Te chel tomp á Gejú dit a sü discepui: <sup>1</sup>Osc cör ne se lasci nia turbé. Cherdede te Dio y cherdede te me! <sup>2</sup>Tla ciasa de mio Pere él trespas abitaziuns. Sc'ara ne foss nia ensciö, ves essi dit danló: I va a ves arjigné ca n post? <sup>3</sup>Canch'i sarun jü y ves ará arjigné ca n post, vegni endô, y i ves condüji da me, por ch'i seise ince os, olache iu sun. <sup>4</sup>Y olache iu va – chel tru conesceise pô. <sup>5</sup>Tomesc ti á dit: Signur, i ne sán nia olache te vas. Co desson pa spo conesce le tru? <sup>6</sup>Gejú ti á dit: Iu sun le tru y la verité y la vita; degügn ne róa dal Pere ater co tres me. <sup>7</sup>Canch'i m'areis conesciü, conesciareise ince mio Pere. Belo sen le conesceise y l'eise odü. <sup>8</sup>Filípus ti á dit: Signur, móstresse le Pere; cösc nes basta. <sup>9</sup>Gejú ti á respognü: Belo tan dio sunse pa os, y te ne m'as nia conesciü, Filípus? Chel co á odü me, á odü le Pere. Cö sciafieste pa da dí: Móstresse le Pere? <sup>10</sup>Ne creieste nia, che iu sun tal Pere y che le Pere é te me? Les parores che iu ves diji, ne diji nia da me enfora. Le Pere, co é te me, ademplesc söes opres. <sup>11</sup>Cherdedemo pô, che iu sun tal Pere y che le Pere é te me; sce nia, spo cherdede almanco por gauja dles opres! <sup>12</sup>Amen, amen, i ves diji: Chel co crei te me, fajará ince les operes che iu feji, y al nen fajará ciamó de maiús, deache iu va dal Pere.

Oraziun dal de

*Dio, nosc Pere, te nes as salvé por opra de to Fi y te nes as tut sö desco tû fis bunorüs: ciara plen de bunté sön düc chi co crei te Crist y scinchi la derta liberté y la vita eterna.*

*Do cösc te periunse por nosc Signur Gejú Crist, to Fi, co é Dio y vir y regneia con te t'unité dal Spirit Sant por düc i secui dai secui. – Amen*

(Lezionar A)



Letôres dla Sesta domegna de Pasca:

St.Ap 8, 5-8.14-17 | 1 Pire 3, 15-18 | Jan 14, 15-21

## Edema liturgica dai 10.05. ai 17.05.2020

Ince les funziuns de cöst'edema ven tignides zonza la comunité y sará ma da aldí tal Radio de Ploania.

<b>DOM 10.</b>	<b>Cuinta domegna de Pasca - De dla oma</b> <i>Iob, Damian de Veuster</i>
<b>08:30</b>	<b>gran messa</b> por dōta la ploania <b>s.m. d'aniversar</b> ( <i>co foss stades de merz</i> ) por † Genoveffa Ellemunter ved. Rigo por † Teodolinda Promberger Trebo y por † Lois Valentin
<b>12:00</b>	<b>al ven soné adöm: les ciampanes envieia al'oraziun</b>
<b>19:30</b>	<b>la ciampana envieia al'oraziun</b>
<b>Lön 11.</b>	<i>Walter, Iachin, Gangolf</i>
<b>19:30</b>	<b>la ciampana envieia al'oraziun</b>
<b>Ded 12.</b>	<i>Pancrazius, Nereus y Achilleus, Imelda</i>
<b>19:30</b>	<b>la ciampana envieia al'oraziun – corona</b>
<b>Dem 13.</b>	<i>memoria de Santa Maria da Fatima, Servaz</i>
<b>19:30</b>	<b>la ciampana envieia al'oraziun</b>
<b>Jöb 14.</b>	<i>Bonifaz</i>
<b>19:30</b>	<b>la ciampana envieia al'oraziun – fuziun de ma</b>
<b>Ven 15.</b>	<i>Sofia, Sonia, Isidor, Friedrich</i>
<b>19:30</b>	<b>la ciampana envieia al'oraziun – corona</b>
<b>Sab 16.</b>	<i>Johannes Nepomuk, Ubald, Adolf</i>
<b>19:30</b>	<b>la ciampana envieia al'oraziun</b>
<b>DOM 17.</b>	<b>Sesta domegna de Pasca</b> <i>Dietmar, Walter</i>
<b>08:30</b>	<b>gran messa</b> por dōta la ploania <b>s.m. d'aniversar</b> por † Paola Pedevilla Maneschg, Col Marchet por † Jep Ellecosta, Taibun/Ombolt por † Iuliana Maneschg Erlacher, Plaza
<b>12:00</b>	<b>al ven soné adöm: les ciampanes envieia al'oraziun</b>
<b>19:30</b>	<b>la ciampana envieia al'oraziun</b>

*i recordun:* Ida Peslalz Magrotti, *Balsan* † 15.05.2010  
Paola Pedevilla Maneschg † 16.05.2019

→ **Santes Messes por defonti:** les messes **dal ann** por defonti **belo paiades**, co foss tomades ete do i 9 de merz, ven sen dites les domegnes dla gran messa ales 08:30 (radio dla ploania). Chi co ó aposté **messes dal ann da dí proscimamonter** pó mené na e-mail a [ploania@gmx.net](mailto:ploania@gmx.net) o telefoné a Franz Rigo, ☎ 347 2310129. Ince cōstes ven spo dites en iade entant la domegna.



## Posc rresservés (Jan 14, 1–12)

### I ponsi do

*Gejú s'arjigna ca da lascé la tera. Al n'é nia n adio: el sará ennant pa nos.*

*Jí sön so tru, ti orei bun con dōta nosta vita y ascuté sōa Parora de verité é la maniera da romagne con el.*

*Sō al ci él por vignönn n post belo arjigné. I ne le ciacun nia da cumpré con scioldi y al n'é nia n pest por i plü fortünés: al é na scincunda, früt de so amur y de sōa misericordia. Nos án la responsabilité da tó ete o da perde cōsc post.*


### I preii ensciö

Gejú, sarál ince mio post tla ciasa dal Pere? Recordete pa da meter mio ennom bel da odei por che degügn d'atri ne se sonti jö enló y ch'al sii sogü lede y arjigné canch'i vegni sō da te. Mo samben ch'i messi m'al merité! I mo comportará desch'al alda, jará a messa, ne dijará nia de bortes parores, soportará mi fredesc, fajará i laurs con lezitonza ... Cōsc ne basta nia, catö? O él massa trep? Al n'é de chi co s'al davagna con tre' de manco, mo ince de chi co le perd por matades. Nos san che le post é tó, ma tō s'al as arjigné ca a nos. Tō l'as cumpré a n prisc der alt y a nos s'al daste debann. A te t'ál costé la vita y a nos s'al piteste por podei vire con te por dagnora. Tō es n compagn demorveia, Gejú. lu ô ince te dé n post, le miú: chel te mio cōr.

*Walter Cazzaniga, Parola amica – Il Vangelo della domenica per ragazzi*



### I ponsun con le Vangelo (14, 1–12)



- 1> Osc ... ne se lasci nia turbé
- 2> i ne sán nia ... te vas
- 3> Co desson pa spo ... le tru
- 4> lu sun le tru y la ... y la vita
- 5> Belo sen le conesceise y l'eise ...
- 6> Signur, móstresse le ...
- 7> spo ... almanco por gauja dles opres!
- 8> fajará ince les ... che iu feji.

